

05/09/2001

SUPP parti pertama umum senarai calon

KUCHING, Selasa - Parti Bersatu Rakyat Sarawak (SUPP) menjadi parti komponen Barisan Nasional (BN) Sarawak pertama mengumumkan senarai penuh calonnya untuk pilihan raya umum negeri kelapan yang akan diadakan 27 September ini.

Bagaimanapun, ketika mengumumkan senarai calon itu, Timbalan Ketua Menteri merangkap Pengerusi SUPP, Tan Sri Dr George Chan Hong Nam, berkata keputusan muktamad mengenai senarai itu akan ditentukan pucuk pimpinan BN.

"Jawatankuasa Kerja Pusat (CWC) SUPP meluluskan senarai penuh ini hari ini tetapi ia masih memerlukan kelulusan muktamad Perdana Menteri, Datuk Seri Dr Mahathir Mohamad; dan Ketua Menteri, Tan Sri Abdul Taib Mahmud," katanya.

Senarai 17 calon itu termasuk lima muka baru, yang mana seorang daripadanya calon wanita, Lily Yong Lee Lee, yang juga Setiausaha Politik kepada Ketua Menteri Sarawak.

Yong 52, dicalonkan SUPP untuk bertanding kerusi Dewan Undangan Negeri (DUN) Padungan menggantikan penyandangannya, Datuk Song Swee Guan, yang mengundur diri.

Dua lagi muka baru ialah bekas Pegawai Penerangan, Ranum anak Mina, 50, yang dicalonkan parti itu bertanding di Tanjung Datu menggantikan Datuk Ramsay Noel Jitam yang juga mengundur diri serta bekas Timbalan Setiausaha Agung Parti Reformasi Negeri Sarawak (STAR), Dr Belek @ Jerip anak Susil dicalonkan bertanding di Bengoh menggantikan penyandang sekarang, William Tanyuh Nub.

Bagi kerusi Meradong yang kini disandang calon bebas, Yii Chu Lik, pula, SUPP akan mencalonkan seorang lagi muka baru yang juga bekas Senator, Datuk Ting Check Sii; manakala bagi merampas kembali kerusi DUN Bukti Assek yang kini disandang Pengerusi DAP, Wong Ho Leng, SUPP akan meletakkan seorang lagi muka baru, Daniel Ngieng Kiong Ann.

Dr Chan berkata, penyandang sekarang yang akan dikekalkan ialah beliau sendiri yang akan mempertahankan DUN Piasau; Datuk Sim Kheng Hui (DUN Pending); Chan Seng Khai (DUN Batu Lintang); Alfred ap Chin Loi (DUN Batu Kawah).

Francis Harden anak Hollis akan dicalon mempertahankan kerusi DUN Simanggang; Toh Heng San (Engkilili); Datuk David Teng Lung Chi (DUN Repok); Dr Soon Choon Teck (DUN Dudong); Datuk Wong Soon Koh (DUN Bawang Assan); Michael Sim Kiam Hui (DUN Kidurong) dan Lee Kim Shin (DUN Senadin).

Bagi kerusi Pelawan yang kini disandang calon bebas, Jason Wong Sing Nang, SUPP sekali lagi akan mencalonkan Vincent Goh Chung Siong. Pada pilihan raya 1996, Goh yang memperoleh 6,486 undi, kalah kepada Sing Nang (pada waktu itu bertanding atas tiket DAP) yang mendapat 7,460 undi.

Dr Chan berkata, senarai penuh calon SUPP itu diputuskan oleh tujuh ahli CWC SUPP dipengerusikan beliau sendiri yang bermesyuarat hari ini.

"Bagi SUPP, senarai ini adalah senarai muktamad bagi pilihan raya kali ini tetapi ia bergantung kepada kelulusan Perdana Menteri dan Ketua Menteri. Jika atas sebab tertentu Perdana Menteri atau Ketua Menteri merasakan seseorang calon itu tidak layak, kita akan akur dan mencari penggantinya," katanya.

Pada pilihan raya umum negeri 1996, SUPP bertanding 17 kawasan dan kalah empat kawasan iaitu di Kidurong, Bukit Assek dan Pelawan kepada calon DAP dan bagi kerusi Meradong pula tewas kepada calon bebas.

Namun dalam pilihan raya kecil 1997, SUPP merampas kembali kerusi Kidurong daripada DAP. Bagi kerusi Pelawan pula, ia kini disandang wakil bebas, apabila bekas Pengerusi DAP, Jason Wong Sing Nang yang menang di situ pada 1996 keluar DAP dan menjadi anggota bebas.

Sementara itu, Dr Chan menasihatkan mereka yang tidak dipilih sebagai calon supaya bekerjasama dengan calon yang ditetapkan demi perpaduan dan keutuhan parti serta bagi menjamin kemenangan 100 peratus BN dalam pilihan raya kali ini.

Beliau juga memberi amaran akan memecat mana-mana ahli SUPP yang bertanding menentang calon BN pada pilihan raya umum ini.

Dr George berkata beliau juga sudah menemui mereka yang tidak dipilih dan mereka bersetuju memberi kerjasama dengan calon yang dipilih.

"Kita perlu meletakkan kepentingan parti melebihi kepentingan diri dengan bekerjasama demi keutuhan parti dan kemenangan BN secara keseluruhan," katanya.

(END)